

# 《天台上的他和她》



## 角色表 :

阿滿 .....

Moon .....

Wing .....

一哥 .....

小老師 .....

Cry 瑩 .....

SEXY 掛 .....

小朱 .....

CEO .....

粉絲王 .....

Cool Queen .....



## 序幕

（台上燈光逐步亮起，照亮一個舊樓天台的各部份。同時，一個男生，阿滿，他坐在天台的圍牆上，一臉憂傷的樣子。他的照相機也放在他的身旁，而另一邊放了一條手織頸巾。阿滿慢慢轉過身來取相機，緩緩舉起一看；此時，一個女生，Moon，進場，猶如在拍照一樣擺了幾個姿勢。此情此景，阿滿笑了。然後，Moon 慢慢停了下來，望著遠方的夜空。）

Moon  ： ……唔知今晚會唔會見倒呢？

（阿滿傷感地走到 Moon 身邊，欲捉住她，但同時，Moon 亦離去。阿滿哭了起來，然後慢慢回望圍牆上的頸巾，慢慢提起照相機對著頸巾拍照。燈光隨之漸暗。）

## 第一場

（鍵盤打字聲漸多漸大。）

眾網友  ： 唔駛唔開心啫……

（燈光漸亮，但仍然昏暗。眾人站在台上，手提著電腦鍵盤，不停地打字；他們正在上網。他們開始在打字的同時，也夾雜著一些說話，就好像在與人對話一般。但是這些說話較為雜亂，所以不是清楚聽見以下的內容。）

一哥  ： 女咋嘛，搵過件囉……（演員即興）

小老師 : 舊嘅唔去，新嘅唔蒞……（演員即興）

Cry 瑩 : 我俾人飛左呀……（演員即興）

SEXY : SEX SEX SEX……（演員即興）

小朱 : 佢究竟愛我啲乜呢……（演員即興）

CEO : 你地話佢煩唔煩吖……（演員即興）

粉絲王 : 佢真係好型咖……（演員即興）

Queen : 邊個男人唔咸濕架……（演員即興）

（一會，阿滿拿著照相機慢慢進場到台中的位置坐下。）

阿滿 : （作打字狀）Hi All！

（眾人停止雜亂的說話。）

一哥 : 喂！滿仔哥！

小老師 : Hi，小滿滿！

Cry 瑩 : 安安，滿滿！

SEXY : Hey Man！

小朱 : Hi.

CEO : Hi，滿。

粉絲王 : YEAH，小滿！

Queen : 阿滿，你幾好吖嘛？

阿滿 : 嗯……好掛……

CEO : 做咩呀？過左咁耐仲係未放得低？

小老師 : 開心啲啦，小滿滿！

Cry 瑩 : 阿滿，而家有我陪你喇……我剛剛俾人飛左…嗚嗚……

阿滿 : 唔係，嗰件事已經放低左，好好多喇。

小朱 : 係咩事呀？

SEXY : 佢俾人騙財騙色呀，新仔！

小朱 : 吓？咁慘？

一哥 : 咪聽佢亂 up 啦，「食屎怪」最鍾意亂講野。

SEXY : 唔該睇清楚我個名，係「SEXY 掛」，唔係「食屎怪」。大家跟我打一次：SEXY 掛！

其他網友：食—屎—怪！

阿滿 : 哈哈……你好小朱，right？我叫阿滿。

小朱 : Yes～小朱，你好。

Cry 瑩 : 阿滿只係失戀啫……好似我咁……「嗚嗚…」

CEO : 夠喇 Cry 瑩！煩唔煩呀！

Queen : 真係傷心到喊嘅呢，係唔會得閒打咁多「嗚嗚…」咖。

粉絲王 : 懶 Q！

小朱 : 件事係點咖？

SEXY : 係都要講啲傷心野嘅……

Cry 瑩：件事係咁咖，我嗰日一起身……「嗚嗚…」

其他網友：唔係問你呀～！

阿滿：件事係發生喺一幢舊樓嘅天台……

（眾網友逐漸離場。）

## 第二場

（阿滿開始拿起照相機拍攝天台四周，甚至街景。一會，Wing 匆忙進場。）

Wing：Sorry 呀……我又遲到。

阿滿：唔緊要，我預左咖啲。

Wing：你等左好耐呀？

阿滿：我都有特登等，我邊做邊等。

Wing：咁醒？

阿滿：嚟吖，過嚟睇吓啲相，揀吓。

Wing：（看照片）嘩好靚啲……啲幾張都好似唔錯……（在 Wing 看照片的時候，阿滿在自己的背包取出一包檸檬茶）啲張都幾好……（阿滿把檸檬茶放到 Wing 面前）咦？你又知我想飲野嘅？

Cry 瑩：（突然出現）好體貼喔！

其他網友：（出來拉 Cry 瑩走）唔好嘈啦你！（眾網友離場）

阿滿 : (微笑) Light 檸茶，啱唔啱飲？

Wing : ……啱 (取過來飲)

阿滿 : 咁多相你都話 OK，即係唔駛再影啦，係咪？

Wing : 嗯，一定夠個 present 用。

阿滿 : (邊說邊走) 係咁就快啲走，天都就嚟黑喇。

Wing : 吓？點解要走得咁急呀？唔留多陣？

(阿滿停了下來，心情凝重，轉過身來各著 Wing。)

阿滿 : 做完野唔走做咩呀？喱度呀，一入黑就有…… (嚇 Wing)

鬼呀！

Wing : (完全沒有被嚇倒) 信你至奇。

阿滿 : 真咖！乜你唔知咖？

Wing : 知咩呀？

阿滿 : 二千年嘅情人節嘅夜晚，有一個女仔為情自殺。自此之後

呢，喱度就有好多鬼故傳出喇。

Wing : 關於咩咖？

阿滿 : 有人話，每年到左情人節嘅嗰一晚，嗰個女仔都會喺度出

現啦。

Wing : 聖誕節都仲有兩個幾星期先，幾時得嚟情人節喎！

阿滿 : 哦，亦都有人話，佢時不時都會喺夜晚出現……

一哥 : (進場扮鬼叫) 嗚~~~

Queen : (進場) 好收聲喇!

小老師 : (與 Cool Queen 同時進場) 乖啦, 靜靜地聽。

(三網友離場。)

Wing : 我駛扮野喇, 我唔會咁易俾你嚇倒咖。(轉頭一望)

阿滿 : (同時突然拍 Wing 雙肩大叫) 呀~!

Wing : (給嚇倒) 呀! 咩~死人頭, 成人人都嚇人地!

阿滿 : 嘩, 你仲提個「死」字? 唔怕隻鬼搵你呀?

Wing : 咩呀? 人地話唔好提個「鬼」字……

阿滿 : 哦~~~

Wing : 唔玩喇!

阿滿 : Ok Ok……你想留多陣, 我咪陪你囉。睇吓日落都好吖!

(阿滿搭著 Wing 的肩膀, Wing 慢慢擁著阿滿。網友們慢慢進場, 陶醉地望著二人。)

眾網友 : 好浪漫呀~~~

(一會。)

Wing : (拿起帶來的一個紙袋給阿滿) Merry Christmas.

阿滿 : ……Merry Christmas……其實唔駛早送……

Wing : 唔早咖喇……我見都開始凍啦。(阿滿取出頸巾。Wing 立

即幫阿滿穿上。) 鍾唔鍾意呀?

阿滿 : 你送嘅, 乜野我都鍾意……

眾網友 : 嘩~ (各人說以下不同的一句) 肉麻到呢……擺命咩……

真擺膽……氣溫急劇下降……此地不宜久留…… (離場)

小朱 : 唔係吖, 都幾 sweet 呀。(欲離場)

(二人不禁流下淚來。Wing 轉身離開阿滿一點。小朱見狀沒離去。)

Wing : 做咩要喊啫? 我地唔係講好左嘅咩?

阿滿 : 係…… (走向 Wing 的反方向) 係講好左開開心心咁過埋

新年咖嘛!

Wing : ……Sorry……

阿滿 : 幾時呀?

Wing : 下個星期……

(一個小靜默。Wing 慢慢行到阿滿身後。)

阿滿 : ……可唔可以唔走呀?

Wing : (從阿滿背後擁著他)……可唔可以開開心心咁過埋啲個

星期呀?

阿滿 : ……Sorry……

Wing : 咁係咪即係要提早講埋呀?

阿滿 : ……反正遲早都要講咖啦! 可能你聽日又話: 又改左期

啦，聽日就走！

Wing : ……咁我地……今晚就「分手」。

阿滿 : (轉身向 Wing) ……係咁嘅個星期，都唔好再見喇。

(一個小靜默。Wing 傷心地轉身離去。阿滿按著頸巾，傷心地坐在了地上。)

### 第三場

(眾網友也慢慢進場。)

小老師 : 就係咁樣，一對小情人就此分開喇。

CEO : 男人要以事業為重，有錢有地位，大把女人俾你揀。

小朱 : 阿滿，你 OK 嘛？

阿滿 : ……OK。我而家，冇晒事咖喇。

一哥 : 咁咪好囉！

Queen : 天涯何處無荒草。

Cry 瑩 : 滿滿，我就係荒草中嘅小花喔！

其他網友 : 慳啲啦～！

阿滿 : (笑了起來) 咁多位，好多謝你地，我真係咩事都有喇。

粉絲王 : GREAT！拾卜滿滿！

SEXY : 嘿嘿～係咪用左我教你嘅方法呢？

小老師 : 你啲色鬼方法，小滿滿唔會啱用咖！

小朱 : 乜野方法呀？

SEXY : 速速搵條新女，One-night 又好，散拖都好，有性無愛都得！填補心靈空虛。

Queen : 低俗！

阿滿 : 我的確係遇倒一個女仔……

其他網友：吓？！

SEXY : Cool Man. 係樣靚嘅，定係身材正嘅先？

阿滿 : 係愛。

一哥 : 遇倒另一個心愛嘅人？

粉絲王 : 恭喜你呀！

小老師 : 都話「舊嘅唔去，新嘅唔蒞」咖啦！

CEO : 有新發展都係件好事。

阿滿 : 但係已經唔會再有可能喇……

眾網友 : 點解呀？

阿滿 : 因為……

SEXY : 仲唔認係 One-Night !

粉絲王 : 滿滿冇你咁賤！

阿滿 : 我地的確係得一晚……

SEXY : YEAH !

其他網友：吓？！

阿滿：雖然時間好短，但係好深刻。

小朱：仲比之前一段感情深刻？

一哥：又冇得咁比嘅。

阿滿：我都唔知……不過，佢令到我有另一種體會……

小朱：係咩呀？

Queen：感情有時真係唔可以用時間嚟衡量。

SEXY：有時候 One-Night 都真係幾深刻。

CEO：「愛」真係一種好矛盾嘅情感。

Cry 瑩：「愛」真係好令人好煩惱……「嗚嗚……」

眾網友：唉……

阿滿：「愛」，真係可以一生一世。

眾網友：咩話？！

阿滿：想唔想聽一個故事呀？

SEXY：係咩故事先？

阿滿：一個關於我同嗰個女仔嘅故事。

粉絲王：好呀！拾卜拾卜！

阿滿：一個講左都唔會有人信嘅故事。

一哥：咁得意？！

小朱　　：點解會冇人信呀？

Queen　　：我地信你㗎！

其他網友：係呀！

阿滿　　：多謝你地……故事都係發生喺同一個天台……

CEO　　：你又去嗰度做咩呀？

阿滿　　：自從同阿 Wing 分左手，我次一諗起佢，我都會上番去嗰個天台……（網友們慢慢離場。）起初我差唔多隔日就上去一次。聖誕、除夕就更加唔駛講……直到啱啱過左嘅情人節，我都上左去……

#### 第四場

（阿滿心事重重的在天台上漫步，然後停了在天台圍牆，觀看街上的景物。一會，一架紙飛機飛了進場，落在地上。阿滿轉過身來，慢慢將紙飛機拾起。此時，Moon 進場。）

阿滿　　：你咖？（Moon 沒有回應）Hey…我問隻飛機係咪你咖？

Moon　　：哦，（十分高興）係呀，係我咖！

（阿滿示意 Moon 取回紙飛機，Moon 便慢慢行過去拿紙飛機。）

Moon　　：唔該。

阿滿　　：唔駛唔該。（回頭望街）

Moon　　：唔好意思呀。

阿滿 : 吓?

Moon : 騷擾倒你。

阿滿 : 哦, 唔緊要。

(好一會, Moon 只站在阿滿身邊觀察他, 此時 SEXY 掛又搭訕進場。)

SEXY : 哦~就係喱條女……

其他網友 : (進場把他拉走) 收聲啦~! (眾網友離場。)

阿滿 : 做咩呀? 我……阻住你呀?

Moon : (微笑) 唔係呀, 只係好少可……係呢? 你喺度住咖?

阿滿 : 我? 唔係, 我只係……喱度對我有好特別嘅意義……

Moon : ……Sorry, 似乎提起左你啲唔開心野添。

阿滿 : 傻啦, 邊係呢……你呢? 上嚟喱度做咩呀?

Moon : 唔……因為喱度對我都有好特別嘅意義。

阿滿 : 跟人口水尾。

Moon : 係真咖! 喱度特別到……我離開唔倒。

阿滿 : 離開唔倒? 點解呀?

Moon : (故作神秘) ……因為……我係被困喺度女鬼嚟咖~~

(眾網友突然出現。)

眾網友 : 吓?!

阿滿 : 哦~其實我係成吉思汗。

Moon : 你即係唔信我啦！好呀！你試吓掂我吓。

阿滿 : 咩話？

Moon : 我係鬼，所以你掂我唔倒咖。嚟吓！

(阿滿見 Moon 滿有自信的樣子，有點半信半疑。於是阿滿慢慢用手，嘗試觸摸的頭部。當阿滿快要觸到 Moon 時，Moon 立即避開。)

眾網友 : 車~~~~ (離開)

阿滿 : 我就唔信我掂你唔倒！

(如是者阿滿再試兩三次，仍然摸不到 Moon。)

Moon : (鬼秘的語氣) 我都話你掂我唔倒咖啦。

阿滿 : (微笑) 嘎！你喱隻女鬼都……好勁呀！

Moon : (微笑) 原來你識笑咖嗎？

阿滿 : (微笑) 多謝……

Moon : 咁你呢？點解會上嚟嘅？

阿滿 : ……我同我女朋友係喺度分手……

Moon : 點解呀？

阿滿 : 佢要跟屋企人移民去外國，喺個邊讀書。

Moon : 咁都唔駛分手咖，等佢讀完書出嚟做野，咪可以返嚟囉。

(阿滿搖頭示意不可能) 再唔係到你出嚟做野，你都可以去搵佢咖！(阿滿沒有回應，使 Moon 有點怒意) 感情嚟

咖，可以話冇就冇嘅咩？！你點可以咁容易就放棄咖？

哦，定係你識左第二個所以……

阿滿：我冇呀！唔係我想放棄，係佢叫我唔好等！

（二人都發覺自己動了氣。）

二人：……Sorry.

阿滿：佢話對自己冇信心，一去就三五七年，所以……

Moon：分手……（阿滿點頭）我一直都以為淨係男仔先會對感情咁唔堅定……

阿滿：因為你唔係一個咁嘅人，同埋……你太天真囉。

Moon：即係你覺得你會等佢？無論幾耐。

阿滿：……起初係。但係而家，我開始明佢話乜野：時間係最大嘅敵人……起初上嚟，因為我掛住佢……但係而家上嚟，就好似係為左令自己記番起佢……

Moon：咁都好吖，至少你唔想忘記佢。

阿滿：……係咁你呢？嗰度對你嘅意義似乎同我都差唔多啫。

Moon：嗯……不過佢離開我，係因為佢鍾意左第二個……

阿滿：但係你好愛佢？

Moon：（點頭）……所以，我離開唔倒嘅一度。

阿滿：唉，都係你覺得嘅啫。就好似我咁，我諗過多兩三個月我

都唔駛再上嚟咖喇。

Moon : 我唔得……

阿滿 : ……呀係嗎，你係女鬼，被困喺度……點解呢女鬼小姐？

Moon : 因為有啲野我諗唔通……

阿滿 : 你放唔低之前嗰段感情？

Moon : 我係唔明白……我只係希望遇到一個同我真心相愛嘅人  
啫，唔通都咁難……

阿滿 : 其實佢可能都有真心愛過你咖……只係佢好快發現係一  
種錯覺……

Moon : 錯覺？（有點怒氣）鍾意一個人都有錯覺嘅咩？鍾意就鍾  
意，唔鍾意就唔鍾意，邊有得錯咖！

阿滿 : 我只係話「可能」……（Moon 慢慢冷靜下來）你似乎係  
唔想相信佢愛過你……

Moon : 唔係唔想……只係唔想淨係「愛過」。

阿滿 : 喱層我明……我都唔想……

二人 : 如果遇到一個鍾意嘅人，可以一生一世……

（二人無奈地笑。）

Moon : 如果嗰陣時我遇倒嘅人好似你咁，你話幾好呢……

（二人對望了一會。尷尬地靜下來四處張望。一會，Moon 回望身邊

的阿滿，入了神一樣。突然阿滿回望 Moon，Moon 便立即閃避他的眼神，若無其事地望著夜晚的街景。突然，阿滿一手捉住了 Moon 的手。）

Moon 　： 你做咩呀？

阿滿 　　： 喲，我都話我實掂倒你咖啦！

（此時阿滿才認真地清楚望見 Moon 的樣子，不其然地入了神凝望

Moon。）

Moon 　： （尷尬地）係喇係喇……咁你可以放手未呀？

阿滿 　　： （尷尬地放開 Moon 的手）唔好意思……（把頸巾脫下，再穿到 Moon 身上）咁樣你會冇咁凍……

Moon 　： （望一望自己的手）……唔該……

（二人又尷尬地靜了下來。此時 SEXY 掛又再度進場，其他網友亦跟在其後。）

SEXY 　　： 喲，見啦，好明顯係撻著左啦……

其他網友： 係喇係喇……你可唔可以靜啲嘅呢？

SEXY 　　： 都話左搵過個新嘅，就係忘記個舊嘅最好方法啦！

其他網友： 知喇知喇……至叻係你喇……走啦～！

（眾網友離去。）

阿滿 　　： 其實……可能有個方法可以幫你解開心結咖……

Moon : 係咩呀？

阿滿 : 你……有冇試過……鍾意左第二個……又或者係俾另一個人吸引住……

Moon : 冇……好少……我好少同其他人有接觸……

阿滿 : 係咩……其實，你……幾可愛。

Moon : 係咩？

阿滿 : 我地都好似幾夾……(Moon 突然緊張地望著阿滿)唔係，我嘅意思係，我地好多野都幾似……咁啫。

Moon : ……至少我地對感情嘅期望都幾似……

(這個時候，阿滿看見 Moon 這個既尷尬又若有所思的樣子，不其然就提起了照相機，對著 Moon 拍照。相機的閃光把 Moon 嚇了一跳。)

阿滿 : 好靚。

Moon : 真嘅？(欲看相)

阿滿 : 如果多啲笑容會重好睇。

Moon : (嘗試笑)……咁樣呀？

阿滿 : (拍照)差唔多喇……

Moon : 俾我睇吓？

阿滿 : (拍照)同你影多幾張先啦，一次過睇會開心啲……(拍照)試吓擺多幾個 post 吓……(Moon 嘗試做不同的 post

給滿不斷拍照)係喇，你鍾意做咩都得咖嗎……啱喇，最緊要係開心……係喇，越自然越好，冇錯！啲吓笑得好靚……係咁喇，笑多啲……

(Moon 越拍越開心，不時對著相機展現出最燦爛的笑容。一會，Moon 停止了不斷的動態，笑望夜空。阿滿見狀拍下最後一張相。)

Moon : ……唔知今晚會唔會倒呢？

阿滿 : 吓？

Moon : 滿月呀。

阿滿 : 哦……一定會見倒。

Moon : 點解你咁肯定呀？

阿滿 : 因為……我覺得只要人開心，就會事事都順心……頭先你咁開心……

Moon : 咁都係因為你啫。

阿滿 : ……如果你想，我可以喺度陪你直到見倒滿月為止……唔知你，俾唔俾啲個機會我呢？

(阿滿把相機放了在天台圍牆上，然後慢慢行到 Moon 前，向 Moon 申出一隻手。)

Moon : 你真係想陪我？

阿滿 : 我會陪你……如果你想。

## 第五場

(Moon 望著阿滿，再望望阿滿的手。Moon 考慮了一會，慢慢把手放到阿滿的手上，二人喜悅地緊握對方的手，仰望漆黑的夜空。眾網友慢慢進場，以極慢的動態，經過、叫喊、工作、聊天、逛街、追逐……等等，彷彿在引阿滿注意般，又彷彿是在四處尋找什麼似的。一會，二人同時回望對方，開始了以下的一串對話，同時又轉換了握手的形態，轉換了大家的位置、行到台上不同的位置。二人的速度都是正常的。是一幅抽象的動態畫面，可見二人心中旁若無人的狀態。)

阿滿 : ……我都仲未知你叫咩名？

Moon : ……阿 Moon，你呢？

阿滿 : ……阿滿……喱種感覺同以前一樣……

Moon : ……只係唔係出現喺我同你之間……

阿滿 : ……咁你開唔開心？

Moon : ……最奇怪嘅就係……

阿滿 : ……我好開心……

Moon : ……唔通我以前相信嘅係錯嘅？

阿滿 : ……定係我諗得太多？

Moon : ……諗得太完滿？

阿滿 : ……我可以感覺倒……

Moon : ……你隻手好溫暖……

阿滿 : ……有你喺度……

Moon : ……你唔覺得凍咩？

(阿滿搖頭，Moon 見此甜絲絲的微笑了。此時，眾網友也由好似找到了伴一樣，成雙成對的走在一起，以不同的形態分佈在台上不同的位置。阿滿牽著 Moon，行到天台的圍牆處，站上去觀看夜空，Moon 亦輕輕依傍在阿滿的肩膀上。此時，正正露出了一輪皎潔的滿月。

Moon 看到這圓月更是感動，好像明白了什麼似的回望阿滿。)

阿滿 : 做咩呀？

Moon : 終於見倒喇……咁之後呢？

阿滿 : 之後你想點吖？

Moon : 你真係會陪住我？(阿滿點頭)唔會變？(阿滿點頭)就算我唔再喺你身邊都一樣？

阿滿 : (呆住了)……點解呀？

Moon : (見阿滿之反應，笑了)傻瓜，咁都唔識答……多謝你。

阿滿 : 應該係我多謝你……

Moon : (連忙搖頭)……我真係覺得，我都可以離開喱度喇。

阿滿 : 你放低左佢喇？

Moon : 我明白左……所以，我真係要走喇……

(眾網友慢慢行到二人後邊。)

阿滿 : 我送你吓。

Moon : (傷心的笑了) 傻瓜, 冇得送咖。

(其中幾個網友捉住了阿滿。一些慢慢把 Moon 身上的頸巾脫下。)

阿滿 : 點會冇得送……(發覺自己動彈不得) 點解我……

Moon : 我咪話左你聽囉, 我係鬼吓嘛。

阿滿 : ……你可以, 離開?

Moon : (點頭) 因為你。

阿滿 : 我地唔會再見? (Moon 點頭) 你想咁咩?

Moon : ……我地冇得揀。(開始慢慢離去。)

阿滿 : 我會去搵你咖……

Moon : 唔好傻呀!

阿滿 : 點解呀?!

Moon : 因為我鍾意你!

阿滿 : 我都鍾意你呀!

Moon : 咁你應承我, 好好生活落去。(阿滿沒有回應) 我會喺你  
心裡面嘛?

阿滿 : 會! 永遠都會!

Moon : 咁就夠喇……你都會……(雙手按著自己胸口) 應承我。

阿滿　　：好……我應承你……

Moon　　：我信你。(離去)

(此時，眾網友慢慢放開阿滿，阿滿望著 Moon 在自己眼前消失，傷心地慢慢坐下。眾網友亦慢慢離去。台上只剩下阿滿和天台圍牆上的頸巾和照相機，位置如同序幕。阿滿之後便重覆了序幕的一連串行為：慢慢轉過身來取相機，緩緩地看。此情此景，阿滿笑了。然後，阿滿傷感地走到之前 Moon 站立的位置，欲捉住她，但什麼也沒有，阿滿哭了起來。)

## 第六場

(此時眾網友再次進場，無奈的走到不同的位置望著阿滿。然後，阿滿慢慢回望圍牆上的頸巾，慢慢提起照相機對著頸巾拍照。一會。)

SEXY　　：鬼故嚟咖？！

Cry 瑩　　：乜你份人咁冇情趣咖！

其他網友：咪係！食屎怪！

阿滿　　：唔係嘅，你地覺得係咩故仔都得咖。

一哥　　：你又話冇晒事？

小朱　　：睇嚟嗰件事仲傷過上一次啫。

眾網友　：係囉。

阿滿　　：你地信我？

眾網友：點解唔信呀？

阿滿：……多謝你地。

CEO：但係你真係 OK 㗎嘛？

粉絲王：係囉。

Queen：幾個月失兩次戀喎……

阿滿：真係 OK……因為佢令我明白左一樣野……

眾網友：係咩呀？

阿滿：……（用手接著自己的胸口）佢永遠都會喺我心裡面。

SEXY：你荒你唔會遇倒第二個咩？

眾網友：食屎怪！！

阿滿：可能會咖……

眾網友：吓？

阿滿：……（微笑）但係我啱一世嘅啱一段時間……我嘅心，永遠都只會屬於佢……

小朱：……咁，都已經算係一份「一生一世嘅愛」。

阿滿：（滿足地微笑）係！

（眾人慢慢望著觀眾的方向，一個遙遠的地方。燈光亦隨之慢慢至全滅。）

劇終